

Cyprus Insula, cum Stalimene, Chio, Mitylene,
Negroponte, Cerigo, & Rhodo, Insulis.

Regio.
Situs.

Caliqualitas.
Soli fertilitas.

Imperium ma-
jorum.
Urbes.

Flumina.

Montes.

Insula.
Situs.
Soli fertilitas.

CYPRUS inter majores Maris Mediterranei insulas locum sibi jure vendicat, dicta, vel a *Cypro* Cynicæ Filia, vel ab arbore *Cypro* huic Insulæ peculiari. In medio Iffici sinus inter Ciliciam ac Syriam jacet: ad Ortum est Mare Syriacum & Sinus Ifficus, quem vulgo *Golfo de Laja* vocant: ad Occasum Mare Pamphylium: ad Meridiem Ægyptium pelagus: ad Septentrionem spectat asperam Ciliciam, quæ nunc *turcomannia*, vel secundum alios *Caramania* dicitur. Habet in circuitu quadringenta & viginti septem millia passuum, in longitudine vero ducenta, teste Bordonio. Ingrato quidem ac insalubri, ut plurimum Aere fruitur, ob stagna tetrum vaporem exhalantia. Insula tamen omnis mire fertilis est. Fert enim ubertate quadam stupenda, quidquid vitæ ex voto transigendæ, deliciisque fruendis necessarium: Triticum, Hordeum, aliaque Frumenti genera, Vinum præstantissimum quod cum Cretico gratia certare potest: Oleum Saccharum, Mel, Sal nativum ac fossile, Poma Medica & Citria, Limones, Dactylos, aliosque Fructus nobilissimos. Aurum item, Gossypium, Lanam, Crocum, Coriandrum, Sericum, & quid non? Smaragdo etiam Chrystallo, Ferro & Alumine nobilis est: Ære imprimis, quod ibi primum inventum creditur, tanta copia, ut Cyprus ærofa ex eo dicta fuerit. Ex pilis quoque Caprarum, pannus conficitur cui *Zambelotto* nostra ætas nomen dedit, Diodorus Siculus lib. xv scribit huic Insulæ novem Reges præfuisse, qui tamen omnes Regi Persarum audientes erant, Habuit & Tyrannos Græcos. Olim quindecim urbibus claram fuisse legimus, quæ nunc majori ex parte interiire. Harum clarissimæ fuere, *Paphos*, nunc *Bapho*: *Pala Paphos*, quo primum ex mari Venerem egressam affirmabant accolæ: *Salamis*, hæc in amœnissimo sinu Orientalis littoris posita fuit, habuitq; trajectum ex Syria commodissimum. Ea postea dicta est *Constantia*, habuitq; Episcopum Epiphanium. Fuere & *Amathus* & *Cerania*. Hodie celeberrimæ sunt, *Nicosia* & *Famagusta*. Ex Olympo autem Monte duo insignes exeunt amnes, *Lycus* & *Lapethus*, prior in Austrum, posterior in Septentrionem decurrit. Quanquam alij torrentes potius dici debere existimant, quam flumina: quia interdum exsiccantur: quo tempore Incolæ summa laborant aquarum penuria. Plures sunt in hac Insula montes, sed omnium altissimus est *Olympus*, quem *trohodon* vocant, arboribus omnis generis vestitus, & undique exstructis Monasterijs insignis, in quibus habitant *Caloieri*. Ambitus ejus LIV mill. complectitur.

Stalimene.

LEMNOS Insula Maris Ægæi, hodie *Stalimene* Turcis & Italis: inter Thraciæ Chersonesum, & Athon Macedoniæ montem, Thraciæ opponitur. Ambitus ejus ad centum millia passuum (ut Bordonius refert) extenditur. Qua Orientalem plagam aspicit, aridam & Frugibus minus idoneam: inter Meridiem & Occasum vero Agri admodum fecundi, qui Triticum, Legumina, Pisâ, Fabas, Vinum, Linum, Cannabin &c. proferunt. Terra